


泰泉集

丁



五言古詩

詠志二十首

栖遲衡門下向夕絕來鞅輕風蕩微月玄景
振清響遊心觀物化閒庭恣偃仰蒼蠅以翼
鳴營營在蛛網鴻鴈隨陽飛一覽八紘廣
朱火照玄夜耿耿懷平生雲漢經中天爲章
竟何成瀟瀟風雨歇引領晨雞鳴褰帷納素
月悠然鍾我情

來夜聞商歌迅響何裊裊凄清徹天地游條
出深沼豈無雅與南所嗟知者少美人悵何
許遺世隔雲表容輝耀日月芬芳徧幽眇緘
書道情素願寄西飛鳥

太儀運天地日月相沉浮瀛海揚其波巨鰲
奠神州真宰每如茲逝者何時休姬公避管
蔡仲尼涕衰周從事不及時毫末成山丘雞
鳴盥漱初營營何所求

端居發深省怵悒莫予語松喬鍊金質求爲
萬象主褰裳從之遊凌霞頰窈窕宇熒熒桃李
花蕩蕩蜉蝣羽胡然耀人目所得能幾許

登樓望高山密雲結重霄農祥阻靈雨四澤
居然焦遥遥慰我心青青見陵茗常恐鷓鴣
至衆芳從此凋

今茲復來茲願言美禾麥飽食輕寸陰何由
崇明德日月馳光輝中自爲蠱賊天下歸其
仁顏生惟自克芟除若不早斤斧何嗟及今
我長兢兢雷聲在淵默

赤身集卷四
五
城隅有奇樹昔爲霜所枯東風旦夕至枝條
競芬敷達官駕高馬萬夫行避途威光奪靈
電意氣傾皇都逢時恣嘵喻政道猶蒲盧何
哉仲尼志浮海思乘桴

大道久已隱中情末由寫所欣青陽動庭槐
綠盈把仲尼亦何歎匪虎率曠野出門望長
川誰爲問津者

上山采芙蓉日莫傾筐歸騶軻陳王道脂車
向梁齊龍戰方擇肉志願空令乖理人爲之
牧嗟哉名實違布穀春無畚促織秋無衣悠
悠感物變惻惻懷丞黎

昔余客幽燕步上黃金臺駿骨日以輕昭王
安在哉樂生功未奏荆卿爲禍媒風吹易水
波蕭蕭有餘哀誰知百代後東閣凌天開豈
令蹇諤士零落同蒿萊

嶮嶮迴羲輪丹淵出明月天地爲鑪鍬膏火
相煎滅賢聖皆糟粕蘭玉豈芳潔味彼蘇門
歌撫運慙薄劣

熒熒陌上花
朦朦丘中麻
纍纍王侯冢
望望令人嗟
六龍運元化
千古成塵沙
吾聞浮丘公
駕鴻凌紫霞
呼吸日月景
未用思無邪
貴富豈必終
不見青陵瓜

凜凜風霜厲
喬松有貞性
物情無定端
巧言動人聽
掇蜂傷吉甫
拾煤眩孔聖
隔垣聞鬪聲
曲直誰能竟

輕車駕羸馬
悠悠遵達路
東指泰山岑
蒼然翳雲霧
媿無魯陽力
何由照誠素
徘徊彭城下
聞有桓魋墓
朽骨灰已久
石擲安能固
但見榛莽間
縱橫走狐兔

巍巍祝融峰
南臨沅湘水
弭節登其巔
天下猶敝屣
仙者三五人
相招飲瓊醴
羽駕倏不見
丹書誰爲啓
北歸邯鄲道
浮榮何足睨
倚蘭生深谷
脉脉含芳馨
焉知塗上士
木槿同朝榮
達人貴淵潛
豈用夸譽名
中山有竒鳥
啾然鳳皇鳴
商風一夕至
毛羽空凋零
陰陽迭升降
宇宙安所終
誰從廣成子
超然

入無窮南山倚招搖於焉息微躬白荅釋我
勞中谷挹條風南禺有鸕雛願言種梧桐豈
知八桂樹乃在番禺東

于嗟稷下士馳聲仁義場危冠切浮雲寬博
爲衣裳進退協矩度調顏逾珪璋冲澹焉足
保利達乃其常豈若事畋獵鳴鏑馳高岡割
鮮醉言歸百里無豺狼

荒哉陽臺夢無情成匹仇苟非精神合淄澠
爲斷流漢廷富群策一言相千秋金石勒盟
誓倏忽嬰罪尤河清尚可俟漢廣不可求言
樹諼草花庶用忘我憂

陵祀紀行與姚維東殿撰

銜命承明廬明發戒徒御逝將謁陵寢川原
莽馳驚浮陽暎邊埃豐草被廣路英寮諧所
懽聯鑣叙情素輕雷喧薄陰燕山靄然莫前
驅抗雙旌泮水導吾步息囂謝人役撫勝得
天遇喬雲吐金波圓景在高樹陰晴無定端
聚合良可悟與子來今夕願言麗金甍

送大理卿鄭公訊獄如陝西

長焱徹炎暑蕭然燕翼秋天高萬物肅曠士
懷國憂棘寺祇王命嚴程戒華輶自聞帳下
變涇渭頽不流騁望五陵外莽莽胡雲愁原
獸惡罔羅時澤亮不周平反資淑問及遠邊
壯猷君看鷹隼擊詎同鵬鷃游河梁阻西笑
悵別徒悠悠

讀伯夷傳有感

求仁本無怨感義聞盍歸清風滿孤竹首陽

何巍巍拜誦孔子孟言求矣旭日輝何哉馬遷
傳愛與周紀違左右兵義士采彼西山薇克
蚓亦土毛否臧非德威武成二三策撫卷悲
疇依

卧暄二首

魯麟獲已久禮樂日以新大化隨浪遷鬢髮
不待人負暄東榮下泯默安形神弱子左右
戲歌我頭上巾倦且效龍卧寤言爲鳥伸陶
情舉塵爵覺有羲皇春

廼者龐德公耦耕栖鹿門荆棘視城府軼駕
誰能軒吾廬在通達車馬時往還抱獨以混
世曲肱道終存采芳息塵務觀書忘市喧委
和在我躬悠然感乾坤

調鹿出郊謝徐方伯惠酒

調鹿適林野就萍荒水濱水流日東逝春序
猶依辰傾耳無市聲在目多亂雲寒岩寂如
冬古木相與親有酒來南州連觴飲其醇班
荆亦縣榻素心良已勤醉來陟高岡萬化皆
呈新陶然牽鹿歸放浪存吾真

春日草堂雅集分得橋字

浪迹栖烟山采芳混漁樵東風隨我行不遣
瑤草凋招携二三子鸞歌躡虹橋絃琴坐白
石萬壑生神飈真樂豈在酒所貴能久要長
松閱千霜飛蘿拂丹青好鳥枝間鳴飛去枝
搖搖後夜弄雲月相期揮碧寥

南園三忠祠分韻得院字

鷓鴣鳴素商寒威起松院疾風被野草日覺

羣芳變驅車遊南園雲構蔚霞綯桓桓三君子萬代諒如見嗚呼炎宋阨中華駮龍戰金陵生厲階雨雪集維霰誰令王多士藹藹甘爲媛黃河歸紫塞久矣忘燕汴良岳成紇干湖山尚芳宴荆淮日以蹇幹難焰方煽辟彼強弩末魯縞何由穿音胡塵暗三極朔氣彌九縣力斷匈奴臂虛發天山箭長纓竟莫繫大義赫霆電鯨濤浩淒惻中有慈元殿樓舡載國沉輝光與天炫群龍翼日飛隕首猶懷

戀哀哉田橫島不見華元面燕市望蒼梧哀歌淚如綫吾聞賁隅都卉服禹所甸通非羸政始跡是虞皇踐厓門對韶石高岡兩葱蒨危亡人所憐明良吾所羨緬懷南薰弦宏達四門薦言開城且閉國步何由奠有道四夷守無爲萬情忤勿以綺羅貴而謂絲麻賤勿以便辟親而可踈忠彥徒糜磨鈍資見此金百鍊愀然拜祠下誰能媿纓弁

草堂與諸生二首

吾愛秋日佳蕭然適我懷良朋日相覲衆芳
未云衰朱允覃霧澤綠水間雲涯中塘集鳧
鴈接翼鳴喈喈蜻蜒振其羽翺飛亦徘徊物
色每如此會盍何當乖九戩得魴鯉薄言同
舉杯雖無鐘石奏意志中自諧巢居託松栢
遲莫猶能來

采菊登高岡崎嶇行苦飢願見阪田中粲粲
金滿枝芳馨不在遠中心胡乃遺緬懷王子
喬弃俗乘雲螭寄言青鸞鳥瑤華杳難期
實會有程排虛非所知縣圃不可即僊夫誠
已希白榆何歷歷無根自相依實地硜然石
乃爲人所嗤

喜晴四首

解纓息塵駕復此園田居昊穹靳白日后土
成沮如今晨雨初霽良懷浩然舒玄蟬鳴灌
木高鴻凌太虛飄風卷蓬蘢竒岑暎吾廬揮
杯適真性行歌隨所如

離離原上苗混混隨流波久無持祿資所望

良已多農人速吾駕及此風日和南疇理荒
蕨勞者相與歌間關林中鳥窈窕陌上華生
態足娛悅豈憚重荷鋤

散步衡茅下萬木環芳洲白鷺矯其羽清飈
送回流云何雨無正雅遠林與丘肅肅天界
澄泱泱川潢收廢物露其生景風亦和柔及
辰盍朋好濁醪相勸酬清言間長謔冥會臻
神幽巍巍紫芝翁千載相為謀緬彼商山時
為樂有此不委形宇宙內縱浪將焉求

端居撫靈化流幻成陰晴晨雞奏天色起覺
衾裯輕藩籬未云樹溪壑浩已盈抱獨有餘
豫焉知世上情邂逅適所願丹葵耀其英搖
搖庭綠中有鳥時一鳴物色每如此聊以觀
我生

贈郭循夫北上

天池集高鳳炎嶠起潛蚪君子崇令德及時
建芳猷眩壁乃天損閉關非世求修名如有
立千載揚媿修茲行壽親闡明將覲宸旒壯

志麗陽春健翮凌素秋出宿珠海涓弭棹龍
江流蹇予愧德鄰坎壈栖滄洲念子清廟姿
溫溫古天球赤手扶天步丹心開聖謀仗劍
自茲別吾道何悠悠

泰泉紀遊次京北陳公韻

飛蓋龍丘陽投轄鶴臺陰泰泉闕真源乘秋
可高尋烟蘿開野酌寒翠生衣襟采蒲歷窈
窕懷菊經崎嶇安期與崔公千載同素心雲
螭一以駕碧山苔蘚深松風如有情颺颺瑤
華音因之撫元化庶以求吾忱於穆諒在茲
魚鳥自飛沉晤言得真契萬象居然森白駒
倏難繫竚望空遙岑

春郊感興

升彼青門墟縣縣生之瓜策馬者誰子容輝
閑且都楊鑣不相顧我且芸荷鋤但使固根
蒂寧無以爲家姚冶人所羨沉冥道爲徒漂
搖不可食嘆息林中花

冬日與子乾惟鑒兄弟遊泰泉訪鶴舒

臺

天池集南翼帝車迴北衡芳草寒未歇潦川
 憺猶清晏陰日夕起鬱抱何由平朔風肅徂
 軫陟雲延友生周遭度玄渚紆徐蹇落英晨
 霞散餘絢條忽凌虛明虬松移翠葆虹澗流
 金聲轆馬何蕭蕭谷鳥亦嚶嚶蘊真效龍夔
 撫化忘將迎隆墀一朶歎遠壑浩自盈緬惟
 遼海鶴載彼瑤臺笙邈矣安期子迺垂千載
 名

草堂踏月二首

飛鞅登古臺抱膝睇天路紫微何蒼蒼玄化
 莽回互陽鳥來不息江南正霜露飄風振虛
 壑海濤自吞吐世塗渺無端王衡有常度優
 焉懷古今行歌寫衷素

逍遙水上鷺倏忽雲中翔阜冬蟪蛄衰草亦知
 明月光群動夜不息玄天函百昌二蟲何為
 爾高下自有常縱浪大化中洪濤浩茫茫自
 非松栢姿日夕焜以黃慨彼風中葉悠悠安

所將

秋懷

瑟瑟陵上松琅琅峽中泉迴風相遇合淒清
成管絃端居撫時運閔默何由宣野廬盡懸
磬飛輓猶開邊初月張虛弓流火無炊烟明
河不可觴白榆不爲錢吾民亦勞止旻天胡
乃然

陳京兆浮丘心遠亭分得落字

浮丘倚蘭渚鬱水環山郭中流結衡宇炎歊
盡銷落伊人天與游委懷合冲漠投簪隱朝
市緜組尹京洛卷舒貴自我虞羅豈云獲立
隅協鳥性濠梁逐魚樂翛然馳寸心萬古紛
迴薄高雲映樽俎涼雨灑葵藿陶情良在茲
撫物欣有託願爲鴻與鵠相將翔寥廓

三窮畱詩九首爲周侍御同年

縫裳須用鍼蘇瑟須鳴琴芳年纔十七與君
結同心譬彼梧桐枝萋萋倚雲岑豈知雙鸞
曲翻成孤鵠吟幽燈照總帷悽惻誰能禁

芙蓉含早霜亭亭立清泚中雖懷苦心所幸
有蓮子結根徹黃泉不惜爲君死撫膺顧遺
腹一脉尚存此雌雄嗟未判血淚徒盈皆
逝水無迴波斷髮不返根燕好甫三載音容
俄九原高堂有舅姑誰與供晨昏懸弧倘不
遂妾身安用存慟哭視蒼天悠悠竟何言
力田終有獲績紡終成布誰言邁種德一絕
如零露越月無逾旬祥駒自天驚尊璋驚且
喜風骨儼如父提携方自茲陟岵增懷慕

衡茅勿云葑闔門當見天孩提勿云小宗祏
當綿延彌月拜舅姑縞素登堂前嗟哉老無
子仗爾娛暮年爾孤不識父呱呱淚如泉
緜緜孤生從子母相鉤帶旦夕勤護持懼爲
風雪害周宗已磬石孟母猶教誡烏啼書幌
月鳴機荅虛籟旌弓方駢駢奮志從此邁
霜蹄肅皇路雲翼騰天池旭日送檐鵲秋風
飄桂枝慄慄未亡人幸此允榮時驅車向京
洛賓興有程期山川曩悠邈離憂良在茲

北堂有慈竹孫枝凌雲起孤兒復抱子蘭階
映瑤珥四世萃一門九原聞亦喜割鮮開錦
席犀錢一何綺沉憂天所釋樹護乃徒爾
赤霄坦如底驄馬高騰驤顧見風中木慊慊
猶慘傷緘情達楓陛鸞鳳森翱翔巍我表宅
里恩渥允泉鄉我矢三窮詩天道固有常

李番禹席上賦

兔絲依松栢引蔓凌雲天文明席佳會彈冠
懷昔年邵生圭組時寧知在瓜田陳力審所

就周任有遺言弛張道所貴辟彼望與弦華
筵有明牧飛觚羅豆邊坎坎鼓干舞矯矯成
飛鸞醉來命駕起斗柄隨車還浮雲翳金樞
望舒闕復宣曲肱謝肇帶皎日當盈前卷舒
合龍夔庶以道自全解憂適真性杜康無乃
賢

新秋登玄覽臺分韻得峰字

高臺臨萬峰陸海開芙蓉玩弄忘日夕涼翠
生心胸載酒步雲壑豪客紛來從是時秋序

肅天空鴈噫噫蘿月掛霜鏡楓江馳玉龍醉
來藉瑤草鳥外聞烟鐘振衣割然嘯鸞聲落
長松懸知千載後懷吾霞上蹤

郭中丞半隱園迎春雅集

振羽擇菀木育鱗資澄淵豈知歷臺館歛焉
接林泉蒼郊迓春序玄圃敞瓊筵結構崇雅
朴高情屬雲天環亭列翠陌鑿沼引璿源飛
觴坐秩秩曲水聞涓涓令嚴榛莽闢仁鋪桃
李妍壯節挺松竹芳猷播蘭荃木風動靈筓

秀色通漪漣養素成半隱忘言飛泳間祥鷗
仰迢遍賀燕來連翩蹇予諧夙尚臨眺心悠
然

紫雲觀易臺為薛吏部題

鳴鶴振遠臯潛龍耀靈淵懿彼廬山曲栖茲
高蹈賢紫雲結蘭若孤峰靄鑪煙築臺躡幽
勝迎風槩中天侁侁衿珮集瑣瑣珪符捐觀
易研衆妙洗心由浩然開軒丹巘入承宇青
霞連編葦會至贖舍瑟成真筌雖生姬孔後

泰泉集卷四
已悟羲皇前彙征謝嘉遁道以時屢遷垂光
江鯢上求懷丘壑年

泰泉集

戊

七言古詩

臨江道中

正德
巳卯

蕎麥花開山翠飛腰鎌翁孺愁相依金川道
上風浪急玉笥山前烟火微長鯨已墮黃石
磯大將猶舉龍虎旂翩然揚袂者誰子陌上
酣歌緩緩歸

曉發盧溝望京城有感

庚辰

大車殷地揚塵起小車軋軋鳴不已蒼涼似

是長安日嗚咽元非隴頭水玉輦南行築將
臺九重宮闕何崔嵬盧溝橋上闌干曲不似
行人腸九迴

馬上偶述

南風吹沙作黃霧紫驕嘶踏東華路停鑣引
領意悄然宮樹離離聞杜鵑

哀笏園亡弟傳保及開兒玄兒瘞處

瓊樓十二秋無聲龐眉書客乘雲輶珮環宵
宵不知處碧雞啼烟素蟾語人間淚作荆花

雨棚雛伊啞夜臺旅白楊酸風吹草花錦囊
餘春散寰宇

唐谷歌贈郭先生

蒼碧相圍雲接山結廬中谷心自閒深林無
人野芳發空嘯行歌響相荅白駒仰秣瑤瑟
希足音不聞孤掩扉翛然默坐園虛裏萬壑
無聲月如水

演騷贈舫丘日者

朝縹余馬登舫丘攀擊桂枝聊淹留翠濤潤

瀆如中流木蘭爲柁沙棠丹丘中人兮清且
修道遙水裔驟飛虬揚靈珥節光蚴蟻芙蓉
衣裳纒以蘭翠旒孔蓋翩哉緜冶容妍迹無
定端瓊暉藻景搖淪瀾雲霓晻靄矯七盤蹇
帷獨往河之干璜琚纂組縞與紕鬢鬢曼睞
良可懽含商咀宮曲未殫浩倡眇語誰不歎
飄然乘躑徠湘岷築鷺御霞析木津笑翻碧
寥開帝閣指麾黔羸星斗鶉攝提孟陬窺玉
衡羣靈豐豐且屯衝風夕起波龍鱗衆芳
紛糅窮極研滂心媿目符坤乾然疑不作孚
以言招搖珮履何仙仙九州壽夭耿在天世
途埃壒無庸賢飛鸞在效鴟乃騫躑踞沒牖
原湛淵鞠歌問子胡爲然

憶妾行次曾于陽韻

憶妾別君大河口淚洒蒼天誓相守船旁櫂
聲如妾啼船頭水聲作牛吼君家富壓咸陽
人玉樓金屋嬌芳春鸞杯鳳管度朝莫辭家
乃與風濤親風濤洶洶願君返幽幔踈燈耿

孤館別殘蘭。池月猶在落盡棠梨春。不管
脉脉停機待君至。錦織愁文。定將備時
憑鏡聽。卜歸期。好語初同。俄爾異念。君
相從多賈人。相時射利心。胡秦念君交。將
多媚子外。平中險如河水。君不爲憂。反爲
喜。安得長繩係君。趾朝來。喜子胥羅幃。柳
外垂鞭。信馬歸山眉。雲鬢爲君理。一曲尊
前金縷衣。

夢遊僊吟

大羅天高高。衆天夢乘鳳車。揮麟鞭。捫奎
壓軫入超忽。下視齊州空。九烟天直。真人見我
笑。示我丹詮。啓玄竅。玄之又玄。言莫傳。玄以
言傳。非道妙。拜領天訣。葆天和。靈寶在體。消
羣魔。斡旋杓。斗酌元氣。坐令厄劫歸無。何鬱
輪駕我出東極。呼取星辰擁瑤鳥。罡風耳畔
吹素雲端。葉琪花滿層碧。

高吟行贈別楊惟仁

紺園碧院花木深。招風呼月長相尋。與君對
酌縹玉酒。酒闌擊劍時。高吟栖鴉翻露月。當

席老鶴驚霜風滿林尊前不覺肝膽露銅龍
歷歷天沉沉看君意氣何蕭爽玉井冰壺坐
中朗但記歡娛有歲年豈知攜別生俄嚮太
行雲接晉水濱秋花錦石相鮮新君持使節
往問津攬環結珮猶逡巡逡巡未已拂鞭去
河橋曉日新豐樹紫騮跑空塵作雨弦管分
遣遽如許彈冠後君奉明主

月夜登王子小樓放歌

西山蕭瑟掌與平絳河滄月秋有聲白榆丹

梓何歷歷登樓一坐心眼明王郎愛客歌俯
解僧酬况是詞場英踈鐘近戶風漠漠雜花
澆徑雲冥冥剝梨舉火訝斗落園鶴時作摩
天鳴酒酣爲子歌慷慨軒冕且付形骸外車
如鷄栖走碌碌富貴何如取酣快鯤鵬肯怯
天池遠鰕鮒只見蹄涔大朝市于今嫌我真
舊山尚覺長纜在王郎爲我添濁醪相逢能
幾尊前豪讀書徒自恡駒隙涉世無乃紛牛
毛鷄鳴庭樹宿鷺起東方晶晶須更高

廳前槐樹歌爲少傅蔣公賦

廳前古槐誰所植藤蘿到天雲覆地磊落似
是英雄姿扶持詎識神明意父老相傳百載
餘共瞻羽葆聽笙竽森森不數月中桂歷歷
還同天上榆離奇葱蒨真堪憶主人久作瀛
洲客夢裏花黃桂水秋望中雲淨湘山碧當
時燕坐凝妙香卷簾對爾清晝長蕭瑟恍聞
雷雨入天矯欲逐蛟龍翔鵝池亦有當時樹
不是當時舊遊處金蓮夜自九霄歸玉珮晨

從三殿去遂令函夏歌時雍植槐種德將
無同花開葉脫自時序太虛無語昭玄功更
聞來使傳消息蒼蒼不改當年色白鹿貞松
祇自長青牛文梓寧論直槐乎槐乎無與倫
力排搖落開鴻鈞在咎海棕逢杜甫尚欲移
栽向北辰

觀柯學士手植雙柏有感追次西涯韻
雙柏亭亭翠成匝鵝池六月秋蕭颯柯僂僂
去餘芳聲手澤猶存敢輕狎霜皮露葉幾經

年崔嵬欲與雲霄肩維持本自荷真宰典刑
尚想司文權蒼蒼色競西山爽翼鳳勢憑鰲
極長夜寒杓斗入掩映晝永珍禽鳴下上孤
高迥與塵滓隔勁直不爲尋尺枉封植勤渠
信有人振彙岩廊接清響三槐當日期三公
至今名與旭日東燕詒祇爲孫子計何以爲
國收群龍六檜有堂昭斧鉞妨賢無乃羞覓
童廣儲榱桷作時用此事自足罄無窮援琴
一奏高山調柏也爲我呼天風

題畫猶爲丁大章

黃金臺前白日孤終風吹雨泥長途流光向
我馬上徂歸來客舍一事無蘭燈熒熒明檣
梧中夜起坐思江湖有鼠有鼠繁有徒齧齧
橐中視則逋爾黠驚倒眉山蘇買魚穿柳無
狸奴眼中狸奴不可呼擊劔爲爾歌嗚嗚

劉與清尚書夫婦八十壽詞

吳門八月天宇涼狐南婺北相輝光洞庭琪
花滿遙碧震澤萬頃來銀潢蓬瀛恍惚落人

世君家翁姥如劉綱方瞳如月髮如雪意者
紫府傳丹方桃都瑤水入圖畫蒼精雲旗開
渺茫滿堂賓客正繁會鷓弦龍管催行觴膝
前驥子森起舞遶堦玉樹參差長酣來歷歷
話疇昔憶從花縣升岩廊端冕青春靜鷓鷯
埋輪白日銷豺狼至今人誦大司寇蘭臺棘
寺多風霜碧油幢底足氛垢挂冠歸去鱸魚
鄉春秋又閱椿更老冰雪侵凌萱自芳翁今
八袞姥望九耳聞堯舜新垂裳萬年至治

付鼓腹摩挲老眼窺滄葉

三芳行

少司徒西蜀席公少嘗道涪江夢有石浮
于江刻曰三仲聯芳旣而登第取顯庸其
第春彖接武甲科人以為奇驗素翁為作
三芳夢紀余從而歌之

蜀江魚龍吹混茫凌乘倒景浮蒼蒼雷騫電
躍不可測驚濤勢欲搖雍梁衝撞未已激為
珀石萬里一色如天長川后陽侯靜不發水花

雲葉參差光鳥疑明鏡不敢下我泛扁舟如
燕翔此時水面光恠出有石有石隨蘭槳天
書神篆烟可識赤日下照金琳琅三芳有北
自茲始天豈有意登賢良當時一夢落洲渚
覺來漁唱空斜陽紅衣翠帶散秋色江木策
策鳴烟霜黑甜鄉中盡鳥有境投真妄心俱
忘豈知此夢太神巧于嗟三仲今聯芳于嗟
三仲今聯芳高名合沓登岩廊黃金繫肘笏
滿牀紫荆花發春醪香花前高歌嘉樂張二

十五絲招鳳鳳鳳雍雍 帝道昌矢心共
補山龍裳嗟石可轉海可棄流芳會與天無
疆

燕歌行壽陸憲副

朔風蕭蕭越水波碧洲碑兀雲峯峩瓊軒珠
綴臨丹阿王杯錦席紛綺羅吹竽繫筑奏雲
和逶迤鸞舞雜鳳歌態妍曲妙體傴傴微聞
薌澤飄芰荷娟娟蘭玉連枝柯銀魚朱紱光
盪摩賓從鞍馬金盤陀搖舫載酒鳴鶴鵝梅

花雪落覆綠莎嚶嚶谷鳥啼松蘿觥籌凌亂
星轉河當空壁月揚素蛾豸冠一笑鶴髮皤
朱火照耀蒼顏酖千金爲壽豈云多歲歲年
年柰樂何

北風篇贈文衡山待詔

輕陰漠漠飛朔鴻雪崖冰柱連烟空銀缸入
夜照瑤瑟坐擁青綾聞北風北風浩浩吹南
極飛蓬滿天堪歎息銅龍錯落誤昏曉朱鳳
威垂失顏色騷騷屑屑斷復連據梧細聽寒

不眠鯤鵬變化搏碧落虎兕叫嘯愁蒼烟有
時悠揚入寥廓妙韻奇音相間作碧梧翠竹
競竽籟漢女胡姬合弦索又如鮫室鳴杼機
萬靈洶湧乘潮歸老蛟怒挾片雲立海水瀟
瀟皆倒飛吾聞風自土囊起搖蕩青蘋千萬
里蘭臺詞客謾雌雄大塊何心乃如此憶昨
與君同燕娛瓊簾綉幕圍彤爐壘中酬勸不
知暮門外寒威何處無出門勢欲捲平地幽
棲咫尺何由至褰衣似怯寒浪湧刮面不數

春風集卷一
七
錐刀利歸來大咲行路難豈知跬步成關山
百年鼎鼎貴行樂何用跋涉摧心顏君今未
得揚帆去歸夢飄蕭滿煙霧浩歌一曲江南
春北風吹落三花樹

九疑篇紀遊作

九疑連蜷接南斗顧視群山駿奔走三湘秀
色如虹橫萬壑虛濤作雷吼雷吼虹橫自古
今徃吹牧唱愁人心春秋牲玉薦明祀塞帷
誰復來登臨全侯自是循良者夙駕行春度

平野桃花開落訟庭靜邀我尋幽舜祠下我
來曉遠東風行千樹萬樹皆流鶯六鰲蹙沓
谷神動髣髴籥韶天際迎天際相攜躡飛步
自笑登高未能賦輕袂飄飄紫氛曲磴盤
盤出蒼霧蒼霧紫氛長不消木石歌側鹿豕
驕重華靈墳莽何處英娥淚竹空蕭蕭此邦
路隔關河外豈有鳴條堇炎海倦勤已矣復
來巡抱烏弓者曾誰在嗚呼野死胡足稽金
輿蕪沒山鳥啼陟方之說誤千古捐珮無言

春日西日西秉燭斜岩款笑向全侯嫌晝短
多露驚看征旆濕靈風忽送清笳滿歸來祠
下月微明颭颭垂裳如有聲明朝拜別巾車
去更聽流鶯消客情

都城引送陳七表兄之橫浦

都城十月塵如山朔風吹雪行路難侵晨我
已駕馬出薄暮始隨棲鳥還下馬入門見兄
到張燈與兄拂巾帽三年不得奉顏色一觴
且共開懷抱兄之大父我外公翁聲價昔震蓬

萊官家有圖書出秘府兄能取次藏曾中此
時吐露惟衷款笑談衮衮良夜短促膝翻愁
朱火盡縈牕忽見金波滿相看本是同根生
世態悠悠安足評天涯未易輸肝肺海內誰
云皆弟兄我隨玉節別兄去荆門夢結烟中
樹隴頭兩見秋雲飛又向都城得相聚都城
閣道從天開虎豹爲關鸞鳳臺簪纓無數不
敢到兄以材賢長往來兄辭家久常思母天
遣爲丞向橫浦萬樹梅花道板輿一水何曾

春身集卷五
二
隔鄉土兄今十月出都城風景如前非合併
孤舟明日河橋路微雨蕭蕭無限情

秋夜吟贈別信臣士疇二同館

霜清月皎南鴈翔海懷霞想馳故鄉登艫浩
歌秋夜長鳴琴繫筑飛玉觴葭下紫鱗低復
昂踟躕執手上河梁臨伊望洛迴中腸與子
同稠星歲多獵精守玄栖禁坡龍驥翼翼金
盤陀越阡度陌相經過咲談如天懸九河騫
鵬舞鳳鳴蛟鼉宿昔之樂今則那南箕北斗

光有爛別子良易會日難自從透珮辭鸛鸞
建我藩輔命自天揚靈擊汰踰江山綠水浩
浩雲漫漫歲月婉晚多苦顏長河有洲山有
薇我徂于征忘渴飢倚門何歎歎式微紫燕
踏雲天上歸彈冠振纓志莫違我且與子娛
春暉臨岐齋客何所爲

中宿篇遊清遠峽山寺作

中宿之山吁壯哉山巔蘭若崢嶸開兩厓夾
束怒濤湧肩鑰二曜走萬雷林壑蒼蒼莽交

互北夢南雲入回顧帝子來遊不記春柔櫓
輕鷗自朝暮我來披翠上上方憶從蘿幌聞
妙香舊遊回首十年夢天風吹我芙蓉裳山
僧與話盡茫昧玉環金鑲今何在半雲亭子
故依然誰構曾軒屹相對曲磴盤盤窮渺瀰
眼眇足趺不自知滿前叢竹舞風葉映水恐
是青蛟螭崎嶇西轉穿茆入和尙洞古烟尙
濕燭龍下照開積陰仰聽玄蟬嘯風急起來
燕坐形神清魚鳥嬉恬如有情忽聞雲外暮
鐘動殷殷似鬪飛泉鳴攀條尚欲舉瓊蕊荷
鋪還思尋石髓賞餘興極且登艫月出金樞
浩如洗向來探歷無乃勞憑虛舒咲天爲高
岩居川觀夙所願世間龍蠖真毫毛江干擊
汰美清夜與客開尊共傾瀉且置萬事聊歌
呼飛來之說知有無

端午張黃門燕集分韻得細字

張君蒼髯如擁戟起家龍泉重當世我昔幽
栖祇樹林倫郎視我猶兄弟君來奮髯發高

論意氣豪雄畧文藝尊前擊劍星斗動月下
放歌鸞鶴唳倫郎一去未言返招隱無人賦
叢桂聚散于今又一時赤墀青瑣多留滯長
安咫尺不相見松筠寂寞門長閉端午開尊
延我曹賓從過逢得偕詣芳糈清醑溢筵几
艾葉榴花滿庭砌興酣徙倚前榮下促膝相
歡談往歲火雲消盡暮天碧空翠時時落巾
袂世事追思盡萍梗人生那得無根蒂嗟我
亦是江海人感時歷歷慙匡濟翠管銀鬕不

可求細葛香羅復誰製鬪詩懷古三嘆息嗚
呼盛事何由繼燕俗到今傳角黍湘纍終古
傷蘭蕙黃金高臺未蕭瑟南薰古殿猶佳麗
盍簪乍可開懷抱彈冠且莫誇遭際張君愛
客不知暑執執傳觴轉容裔酒闌揮手謝君
去纖月當空飢風細

瓶山小隱爲胡少叅

鴻鈞幽聊不可見眼前突兀皆靈踪有山如
瓶翠當戶青天不數金芙蓉摩挲歎爾誰所

壽欲詰真宰嗟無從頗聞混茫胚爾質列缺
辟歷鎚成峰汲井可以及千里儲粟豈特逾
萬鍾斗杓挹酒爾堪貯嗒然默默知有容臨
溪仙人顧爾咲若作麴蘖煩天翁烟霏護足
肖壺首日月照背成龜蒙巨靈挈之不假器
陰陽爲炭何年鎔分江濟渴澤可注守口銘
座雲長封世途塵鞅未能掉對此吸秀清心
曾仙靈逞逞集鸞鶴元氣浩浩流杉松葯房
蘭室敞天地練要服食忘春冬粵山霞侶儻

相見與爾共佩蒼精龍

劍歌行發桂林作

對酒劍歌行路難黑雲當天凝作山渴龍怒
卷海濤立空林颭颭如人入跳珠白雨騰玄
間迴看平陸皆成灘僕夫戒予行莫急蒼皇
中道何嗟及停車拱極之飛樓紫騮不嘶旌
旆愁駿烏楊光忽垂地驛吏衝泥亦來至翼
予乘霽上前途斧薪作糜勤僕夫逡巡飯罷
出林薄麥雉引雛鳴角角

十載行二首贈王子崇

十載之前我在燕與君相好隨鶯遷十載之
後我歸粵與君相好聽鶯別聽鶯走馬朝王
京玉京十二樓五城山龍垂衣御紫清羨君
輸丹達天肩彤雲縹渺拂綺楹手持金鏡耀
日明 聖皇得一天下貞壽萬萬歲垂鴻名
十載之前與君同彈冠射策明光宮十載之
後與君異薜蘿幽栖謝朝市燕雀豈知烏鳥
情麋鹿耻隨龍虎爭浩然溟濤同此生羨君

衣綵天邊行三十六竿彩鳳鳴東王西母連
雲軒 聖皇達孝天下平壽萬萬年流頌聲
送龔少叅歸田三首

我之田矣東之臯公之出矣攀倪旄愛而不
見心煩勞停雲望久雨聲歇松壑瀟瀟生夜
濤

公之往矣南之浦我之歌矣振林莽帝車無
聲燭龍舞昨晴今雨庸詎知眼前浮雲安足
數

衡門反鎖春泥深
薔薇花開明素琴
公之行
矣成孤吟十年離
合歎岐路脉脉長
江空此
心

中秋登樓賞月分得宵字

彤樓十二連斗杓
層軒珠綴臨岩堯
象筵綺俎相招邀
繡茵文轂停華鑣
兕觥屢酌銀燭銷
喬雲斐亶開碧寥
圓暉炯若英瓊瑤
出自金樞行玉宵
重輪五色成錦幃
兔宮桂斧如可徵
霓裳羯鼓酥僊韶
浩倡妙舞生神飈
藪

羅山立香澤飄素娥
青女空復嬌含顰
流盼心志搖袿裝
重整雙鳳翹夜闌
翡翠栖蘭茗清允
難盈花易凋人生
行樂須久要願言
百歲同今宵

瑟調曲四首壽陳天游府尹

月蟾臨戶星鳥翔
開春發歲舒青陽
笙鳴瑟作嘉樂張
謳和暢阿協宮商
帝臺縹玉盈鶴觴
綺肴蘭俎珍屑香
振纓戟弁紛滿堂
錯衡瓊轂鳴驪蓄
翡翠帷翠幕華燭
光朱明承夜樂

未央緩聲浩倡壽無疆歲歲年年長樂康

碧瞳綠髮天與齡緋衣繡黻臨紫京鬱葱佳

氣鍾山明虎符魚鑰開夜城長江如帶流德

聲五龍雲卧珠海清浮丘羽人授黃庭蒼松

丹桂冬不蕭乾坤一氣魄載營齊光日月食

玉英開軒獻壽寶瑟鳴歲歲年年長合併

和風習習吹華池瑤階玉樹蘭滿枝綵衣屢

舞鴻鵠移齊笙趙瑟薦羽卮雕盤續紛翠金

馳五音繁會陳雅詩羣靈豐豐駐雲璿

鶴跂吹參差清彈妙舞聖忘疲河翻月墮星

斗稀共言爲樂不可支歲歲年年壽無期

天闌洞開何差我太儀發軔升紫霞麟車翻

翻鳴鳳珂仙之人兮紛如麻頰望南極行且

歌彤狐瑞彩映若華九陽晞目炯不遐注我

錦席生黃芽千年桃實如棗瓜薦以雲液朱

顏醜琅璈柯笛參靈鼉歲歲年年僊賞多

臘後登謫仙樓

任城城南樓突兀雪花飛後梅花出雲裏朔

水如白虹東風旦夕來披拂金龜換酒憶當年
鼙鼓幾曾驚醉眠夜郎回望長安日濟水
不到我眉天鑑湖鯨月亦安在但見黃河入
滄海我來大笑歌陽春洪波渺渺開龍鱗

黃月溪太守歸自京師得脫風濤之險
携酒往南園餞之醉中賦此

神龍跋浪辭滄溟喜爾不逐長庚星豪談酌
我紫瓊液南園萬竹皆冷冷溪邊明月照飛
鷺枕外白雲生翠屏揭陽舟楫自今去柰此

薰風蕭艾青

憶昔行賀陶中丞

昇平憶昔憲老間阻兵惟有西甌蠻端溪以
東盡樂土棗柘陰陰連萬山江門談道集軒
冕紫水黃雲多往還都亭津頭萬家市明珠
翠羽車斑斑東山去後崇者圯新寧分疆亂
未已鋤犁逐日化長戟蛟螭血人作流水宮
中未平呂太一闌外徒勞毛御史公來威德
如東山百萬疲瘡一時起出師振旅不動塵

胸次要與天爲春雷雨所到草木新
光風淡蕩波龍鱗佐也支離栖病身
耕鑿今喜爲堯民擊壤引領四海均
誰云盜賊非王臣

醉歌贈王天與歸關中無訊馬伯循

薰風吹酒耳雙熱笑看天地無秦粵
清尊莫嫌琥珀薄後夜珠江空素月
珠江髣髴軒轅丘金鰲蹙沓銀河流
乘槎羨爾汎牛斗直上殺函觀九州
九州茫茫盡如此昔日荒郊今日市
百萬鯨鯢已京觀三千雞犬猶冠履
杜陽山前東逝波祁年官中芳草多
尋幽爲訊三原縣馬卿多病今如何

松巢爲顏錄題

層冰砒斫風蕭瑟談玄邂逅歸根日
若木朝來結紫霞扶光夜轉成金液
濟水逶迤環玉龍翩然獨立東蒙峰
丹丘黃石倘可遇浩歌與爾巢雲松

長短句古詩

月下酌李王二子歌

青袍白馬歎我扉綠蟻沾就霜螯肥長風送
秋入燕樹但見萬里銀蟾飛持螯酌酒向二
子銀蟾弄我盃中輝古來幾許歎圓缺今子
不醉當無歸君不見王子喬君不見丁令威
雲間笙鶴去不返遼遼僊賞誰能希相逢高
歌且傾倒耳熱那聞今是非酒闌揮手一爲
別滿空白露明秋衣

都門逢美人行姚倅奎席上賦送陳叅
政探韻得高舉二字

都門柳絲青可縑間關好鳥求其曹美人久
矣入夢寐咲揮結綠歌鳴臯憶曾贈我金錯
刀欲往報之阻烟濤雲裾月珮忽相見冰雪
一洗心煩勞兔園開尊延旒旄春風淡蕩吹
緋桃觥籌凌亂絲竹動燕咲不知明月高泉
陵別駕醉起舞舞罷逡巡泪如雨感恩自是
門下人殺身未報尊前主當年人棄君獨取
英雄未遇多齟齬劔埋楚國終作龍璞售宋
人何異鼠君不見毛公薛公誰與語風雲感

會生毛羽平原之客徒豪舉

崑山謠送王子繩武歸省

崑山何在在婁江之湄江流浩浩其中石離
離上有玉樹樛其枝啼鳥啞啞枝上栖鳥啼
不休江水移野風騷屑明星稀江介有芳彼
美者籬艾而張羅子於何飛有母今得奉饋
麋有如清水白石長相依不能隨鴻鵠逐逐
稻梁空念飢天寒阻水雪徘徊岐路尚將安
歸

懷羅浮吟贈別何工部

我懷羅浮四百三十有二峰大朶小朶青芙
蓉波沉溲兮根鴻濛列華舒豔兮昭神工盤
空承宇曩出萬象表秀色直射彤雲東中藏
號屏列缺豐隆時和吐霖雨歲早眠蛟龍麟
爲車兮鳳爲馬僊之人兮紛菲菲其如叢亦
有太霞之洞古禹之宮琪花瑤草歷亂映晴
昊鐵橋流水光於虹鳴鶻欽鴉不敢翼而過
往往神聖留靈踪猗嗟走兮昔所幽栖乾坤

造設待結宇日月照耀開璇題一辭蕙帳走
塵坐松花糝徑青後啼水曹僊郎承紫泥與
爾話別蘭臺西螺盃滿酌白玉酒牛鼎初熟
黃金鷄柳條吹絲綰白日醉聽騷裏當門嘶
君今揚帆向我望雲路我猶駐轍係籍通金
閨風塵何躡躡蔚蒼方朝濟浮浮回極中頽
波誰爲隄羅浮望兮愁碧春萋萋歸來歸來
兮採琇瑋以終日種芝朮其盈畦瓊麋雲液
可以供日夕胡爲乎絆柴柵而久稽風驅離
心滿烟樹月照去路聞銅鞮臨岐執手何所
道歸來歸來兮憑君爲我一訪舊日飛雲梯

桂之樹行爲李宮諭壽母賦

桂之樹千萬年蟠根廣寒殿度影滄浪天黃
金爲堂壁玉軒中有鬱儀美嬋娟承日轂輾
星躔朱萼翠葉不知其所際直與若英扶木
相延連孟秋蟾兔當三五光景婆娑滿庭戶
曲按鸞凰酌鸚鵡任丘仙人壽其母母家兄
第金蜩光蓬水搖山映珪組四座歡聲撤綵

霞玉繩不動金波舞令汝齊光壽千萬鬱儀
幽修月中語撫三旌享千庾一任瀛河日東
注君不見桂之樹

淡交行

瓊樓十二中天起弱柳崇桃鬪青紫魚鱗初
開鶴蓋來平頭奴子皆珠履主人愛客名謳
出象瑄鷗絃滿人耳臞鱗膾鯉騰羽觴文笙
黼帳春風裏當筵意氣何所如以漆投膠差
可擬舞罷陽阿花作陣歌殘子夜霞成綺豈
知戈戟在談笑回看堂上生荆杞雨雲翻覆
噫吁噉前有張陳後蘇史君不見君子之交
淡如水

六羊僊人歌贈方棠陵

君行南越復閩越邂逅凌江對秋月持觴不
飲語甌窶仰天大笑纓欲絕飄飄揮手凌紫
烟騎羊抱月成飛僊戲摘匏瓜解殘暑匏瓜
星名
織女黃姑皆粲然昔從九天謫下土車駕前
頭遇威武都人觀者如堵墻搖筆賦詩罵平

虜

正德中作車駕詩直斥江彬幾得詩禍

平虜敢嗔未敢言即

麾鉅鑿登天門扣閣每逢虎豹睡墮地便作
蛟龍蟠有時乘輶向江漢忽然牧牛耕石澗
仙乎仙乎豈無有眼底見君能變幻今年騎
羊來我州六十五日去不留亡鳥飛鳴獨鶴
舞空餘孤樹堂之幽帶圍有花開頃刻頃刻
又作黃金色前驅壺公後九鯉白日果能生
羽翼只今五羊城下歌豐穰謂是五僊騎來
曾降祥君來匹之頓成六觸邪持灋陳紀綱

君不見獬豸稱神羊

賦得三神山壽翟侍郎母

三神山在滄海東燭龍照耀開僊宮璇題接
天綴珠斗萬壘瑞靄青濛濛下有弱流三萬
里四時天樂空中起仙靈來往翳鸞鶴裊窈
霓幢鏡光裏蟠桃結實山之幽菽虧日月枝
相糝金光瑤草莽成數千載傳聞惟十洲翟
公本是東海客出入金鑾佐宗伯手斲元氣
開陽春家與仙靈連窟宅天門咲拂雲錦裳

帝臺滿挹縹玉漿持觴壽母北堂上願母壽
比三山長御厨絡繹傳翠釜玳筵合香鳴蕭
鼓生兒榮貴有如此詞林誰不羨公母我亦
有母天一隅一日不見心煩紆天邊未辦綵
衣舞雲外空傳青鳥書青袍白馬在羈旅目
極飛雲送飛羽爲公高歌歌且長天生南北
莫誰語丈夫碑兀宇宙間緇塵浩浩彫朱顏
顯揚自古貴不朽傑立遭時良獨難不然採
藥滄海上或騎騏驎恣往還君不見三神山

蜀道行送王侍講之四川叅政

蜀道平平如砥沃野烟絲亘千里岷江浩浩
浮元氣劔閣石門相向起錦官城中春意動
玉戶金釭豔桃李耶筒沽取不費錢醉唱巴
渝滿山市比屋繁華漸非昔 帝遣詞臣振
綱紀王夫子起鄒魯黼黻心曾炳如虎弱冠
排風見毛質石室蘭臺奉 明主手持彤瑄
耀日月口授丹書動雷雨邇來暫輟承明直
紫綬金章莅茲土薇垣浩嘯贊玄化坐使蒼

生有環堵君不見漢家使蜀稱三王君豈其
喬當傳芳格天自合有經濟論俗不獨工文
章回車叱馭信忠孝碧鷄金馬殊荒唐維舟
三峽訪千古噉噉青猿啼夜霜君不見浣花
溪古霜楓赤洗墨池荒烟草碧古來名勝乃
如此往往江山盡陳迹丈夫立身貴不朽百
鍊精鋼萬鈞力他日調羹氣益振此別傳觴
醉何惜星車迢迢出蓬瀛問君何時朝紫清
秋風吹衣白露墮執手踟躕空復情高梧參
天鸞鳳集雄劍躍地蛟龍鳴宮花院柳送愁
色孤鶩落霞隨去旌玉壺酒盡情難盡矯首
長安空月明

驄馬行送劉憲伯喬

驄馬驅何悠悠月題染朱汗倏與飛電流昔
驅長安陌今在粵海陬外臺手執天子法
兒能學語皆知劉翩翩鳴珮覲帝旒祖筵
衣冠盈道周酌金罍羅玉羞吹長笛彈箜篌
莫奏折楊柳清霜滿炎州

橘樂亭歌為蕭內翰

亭於何所名橘樂聞在潮陽山麓臨水國上
有古木千章宿猿鶴下有寒濤萬頃走蛟鯉
主人誰歟乃是鐵峰子平生意氣與我同洒
落銀魚金馬棄如土世間何物能羈縛君家
兄弟總能文階前蘭玉香紛紛閒來尋此橘
中樂踈簾清簟忘朝暝竹暉入戶翠如電霞
石映水頰為雲長安回望正如奕文武衣冠
安可聞有時蘭撓下煙渚玄鶴飛來聽人語

鏗然黑白開兩奩荷葉蘆花不知處觥籌凌
亂混笙簫雕盤綺錯堆江瑤酒醒棊罷浩歌
發月墮空江生暮潮可憐紫陌塵凝面何事
朱門候相見衝泥冒雨走碌碌那似尊前且
枯戰我聞橘中樂不減於商山我懷商山皓
枉用凋朱顏紫芝一曲振岩谷漢廷車馬來
追攀笑指雲與鳥出岫仍知還丈夫舒卷要
如此所樂豈必長在山水間

畫龍為劉吉卿題

吾聞后稷之孫驅魃赤水北密雲蔽天天爲
黑黯日颺塵野蕭瑟帝呼董父鞭兩龍翻海
作雨歲乃豐遂令四海歌重瞳又聞夏禹之
御郭支氏南駕兩龍歸后啓雲蓋三重走萬
里龍雖神靈乃爲人所制不獨孔甲之時有
劉累劉生十年遊我門志向磊落似是累後
昆手持此圖開髣髴堂上蒼蒼烟霧屯大龍
昂首欲煦沫小龍回顧如有言追軼似有疾
霆電馬鬣冉冉天瓢翻海濤倏已浹下土元
氣歛吸騰雲間方今西北邊塵起新畬荐荒
誰采芑明堂宵衣總爲此桔槔無功衆芳靡
嗚呼董父郭支不可作劉累空餘秦龍水摩
挲此圖欲招爾爾勿面墻久依倚誰能駕之
獻 天子

碧梧丹鳳圖爲黎侍御一卿題

鳳兮鳳兮爾來當何時知爾之德萬古長不
衰不然上天縱爾九苞羽安用毳毼爲君不
見桃蟲當日飛爲鷓鴣脊令原上啼鷓鴣鳥几

几音嘒嘒室家恐爲陰雨漂偃禾風定杲日出岡上碧梧寒不凋爾於此時來和鳴叶簫韶成王優游君真喜卷阿爲爾歌且謠鳳兮鳳兮被圖對爾起三歎久矣不夢周公旦咸陽宮前多積棘何用屑屑悲秦漢

放歌行贈和惟允

粵王古臺結衡宇八月芙蓉映霜渚饒州太守來舉觴潛蚪躍波聽人語我何以語君曲肱之外多浮雲把玩自怡悅豈必追隨鴻鸞

群君何以語我春陽所施何不可蓬弧志四海豈必赤墀與青瑣眼中離合今十年世濤呼洶胡爲然丹楓葉脫白榆暮明發粵臺懷婺川婺川本是羅施國笑謝雙旌入蓮幕石阡在昔登方岳淵源况復承家學鵬徙何曾同燕雀且盡醪醑爲君酌君不見市上沽何處無生計轉大心易麓清謳不復聞當壚

詠竹分得臨字

憶昔葛陂之龍匿山陰竭來珠海爲瑤林我

知神物固莫測爾與天地皆無心凌冬載酒
爲爾來答臨擊節浩歌懷古今渭川長竿在
何處淇園萬矢空銷沉王侯事業謁齷循蹄
淞况乃奔走隨朝簪爾雖無言洞我臆琅然
答以清冷音須臾萬壑縹緲皆龍吟耳熱謂
是羲皇琴翠光零亂日掛樹清影袅娜天橫
參是時鶴臺仙客同高尋瓊杯綺席依蕭森
尊前對此萬蒼玉牀頭何惜千黃金此系蕭吹
鳳直上層碧岑俯視淑氣聞踈砧天寒袖薄
暮相倚山川蓄落那能禁嗟爾磊落不受烟
霜侵歲晚相看同素襟他年儻逐風雷去萬
里滄溟空自深

送劉行人燦

進春酒陳雅詩惠而好我紛來思何以酌之
金屈卮江漢滔滔東以馳 皇帝萬壽隆天
基日重光海重潤前星從 帝出虜震皇華
原隰電如迅黎元驩欣走相問 絲綸一日
周百郡公之來金鞍玉節從燕臺公之去祥

雲瑞靄停荆樹彩衣曄曄升華堂蘭階蕙幄
交輝光麟蒲薦以縹王漿曲裾長袂鴻鵠翔
介爾眉壽天地長公之翁黃金橫帶鷹繡紅
公之姥魚軒珠翟錦爲黼鳥絃鳳吹參鳴鼙
舉青玉案賡爾歌君臣協德玉燭和麟趾
螽斯仁且多舜日堯年柰樂何

九日粵山登高醉中盡用五微韻成歌
題曰將進酒

將進酒歌鏤衣舉玉爵停金鞮鳳瑄龍笙碩
人其頎于以解憂式飲庶幾尊羨鱸膾紛哉
翻蟹黃初溢鳧翠肥促膝勸君君莫遠君不
見朝始暉夕轉霏魯陽戈在誰能揮嗟爾烏
兔胡爲逐逐環我岩上扉童時種柳今十圍
釣游舊跡徧天地想像徒依稀幸無風蕭蕭
雨祈祈三秋雖云杪九日猶芳菲有翩者鳥
嚶鳴相依盍簪實難知音亦希相逢不爲樂
他時夢寐懷容輝粲粲黃花盈盈翠微肅肅
命駕采采忘歸仰見雲間翼不入虞羅機安

能摧眉折腰謁朱戶趨瑣闥踈鐘動明星稀
酌復酌酒行如翔翬不醉明月將笑我窺簾
幃羊腸世路艱且巍犢有妃妃呼狶狐以爲
蒼當譽反譏齟齬蓬茅叢啼絡緯騰伊臧此
中髑髏昔曾牙緋谷量牛馬塵積珠璣僮奴
策駿歟駢駢薰天勢倏成露晞縱能化鶴去
千載華表誰真逢令威南溟徙鷗鵬西山荒
蔽蔽商顏絕蘿涎渭曲空漁磯古來豪聖今
盡非徒勞營魄聆杳微窮經何用編絕韋我
且濯明河而振纓翳扶光以樂饑吐情向君
君莫笑以誹醉來長嘯粵山上浮雲直北連
燕畿山中多禾蠹蠹如旂其下流水活活清
於沂粵王一去古臺在惟有飄飄霜葉飛

Table with 10 columns and 10 rows of text. The text is mostly illegible due to fading and a large watermark.

...
...
...
...
...
...
...
...
...
...



